

Noticia  
Transparente  
di Gobierno

# ISLA ONLINE

Diabierna 8 Maart 2024

Email: [IslaOnline@gobierno.aw](mailto:IslaOnline@gobierno.aw) Tel: 528-4952



ARTE DI MURAYA  
SAN NICOLAS



**STABILIDAD  
Y  
PROSPERIDAD**

2 0 2 4



**Gabinete Wever-Croes**





**Despues di 4 año**

## **CELEBRACION DI HENDE MUHE A SURPASA TUR EXPECTATIVA**



Dia 8 di maart, nos ta celebra forza, resiliencia y logronan grandi di hende muhenan rond di mundo y na Aruba. Y e hende muhe ta sigui crea y inspira expectativanan y prepara caminda pa un futuro mas inclusivo. Gobierno di Aruba, despues di 4 año un biaha mas tawata tin un exitoso celebracion di Hende Muhe na unda cu un sala yen di hende muhe a wordo inspira pa podera y inspira inclusion den otro hende muhe.

E mainta a wordo dirigi pa MC Thessaly Zimmerman sigui pa un cancion pa Rachel Kraaijvanger compaña riba guitarra pa Zulaika Geerman cu e cantica 'Give Thanks'. For di aki, e evento pa e mainta aki a sigui cu un programa hopi informativo cu varios oradora.

Minister di Finanzas y Cultura Xiomara Maduro tawata e prome oradora y a infatisa cu ta importante pa inspira otro pa ta inclui. Pero pa haci esaki, cada hende muhe mester ta inspira pa ta inclui prome y realisa cu nos tur ta inclui for di e momento cu nos dicidi esey den nos mente. E mandatario a encurasha tur hende muhe pa no limita nan mes y sigui cu curashi padilanti.

Minister Maduro a termina su discurso cantando un pida di cantica di nos cantante Arubano y internacional, Jeon mientras



e publico presente a compaña cu aplauso. Mientras ainda e publico tawata aplaudiendo, Jeon a haci entrada riba stage sorprendiendo tur presente cu e cantica Miss Dior y a pone tur hende riba pia. Esaki, Minister Maduro a expresa, tawata un bunita serenata dedica na cada hende muhe den e sala.

Head of Department na Central Bureau of Statistics (CBS), Desiree Helder, a duna e resultado impresionante di un encuesta cu recién CBS a haci tocante con inclui hende muhe ta na Aruba riba diferente tereno. E resultadonan aki lo wordo publica pa CBS pronto tambe.

Prome Minister Evelyn Wever-Croes, den su discurso a enfatisa cu e hende muhe mester ta na mesa. Activamente. Cu compromiso y cu determinacion. Cada hende muhe mester ta consciente cu tur locual cu nos como hende muhe a logra, lo no sigui perdura si nos lag'e na casualidad, sino e ta existi un compromiso activo di nos cada un. "Ban awe compromete nos mes, na prepara otro mucha muhenan y hende muhenan pa ora nos baha cu pensioen, of laga nos puesto, ora nos subi e lift pa baha bek, tin un rij di hende muhe y mucha muhe para cla pa subi e lift pa asumi nos posicionnan. Cu hunto cu hende hombernan por percura pa un bon balance".



E siguiente oradora, Jenny Croes, a papia riba e tema ‘Amor Propio’. Y a pidi publico pa lanta para pa haci un ehercicio di afirmacion personal. "Mi merece admiracion, respet, cuido, pordon, sanidad, y amor". Esaki, el a enfatisa, ta cuminsa na cada un di nos. Jenny a laga hopi palabra di encurashamento pa esnan presente dunando ehempel riba su experiencianan di su mesun bida. Hende muhe, Jenny a remarca, ta apoya otro mucho mas y p’esey ta importante pa nos tin un persona femenina di confiansa den nos bida pa comparti emocionnan, problemanan y cualkier otro experiencia di bida.

Durante e programa tawata tin 2 pannel discussion cu participacion di muhenan hoben y profesional. Tambe a wordo presenta diferente video informativo y un video hopi emocional di Parlamentario Setty Christiaans-Yarzagaray, Determinacion den cua el conta su storia di su lucha cu un malesa auto-inmunologico y e determinacion cu e tawata tin pa surpasa retonan di e malesa na momentonan mas crucial di su malesa.

Prome Minister a presenta tambe e Comision Contra Violencia Domestico y a gradeci nan pa e trabounan cu nan ta haci. E mainta di celebracion a cera cu e entretenimento musical di e percusionista, Jennifer Van der Biezen.

Prome Minister ta gradici tur hende muhe y algun hende homber cu tawata presente pa celebra e dia importante aki mundialmente, unda ta duna honor na e balor y logronan di hende muhe. Feliz Dia di Hende Muhe. E celebracion di Hende Muhe a surpasa tur expectativa un biaha mas.





# Den conexion cu Dia Internacional di Hende Muhe

## PROME MINISTER SU MENSAHE PA TUR SER FEMENINO: "NOS MESTER TA NA MESA"

Pa celebra y reconoce e importancia di e ser femenino, Gobierno di Aruba a organisa un conferencia riba Dia Internacional di Hende Muhe, cu a hiba e tema "Inspira Inclusion di Hende Muhe". Un mainta educacional, cu a conta cu mas di 850 participante. Durante e mainta aki, por a scucha varios lider femenino cu a bin deleita esnan presente cu informacionnan valioso relata na inclusion di hende muhe den sociedad actual.

Prome Minister Evelyn Wever-Croes tabata tin e oportunidad di duna su discurso titula "Nos mester ta na mesa", na unda el a enfoca riba e importancia pa semper tin un ser femenino na mesa presente, na momento di cualquier negociacion, y/of na momento di tuma decisionnan importante.

Premier Wever-Croes a splica cu e unico manera pa e prioridadnan, preocupacionnan, y retonan di e ser femenino wordo tuma na cuenta ta, si tin un hende muhe na mesa. Pa un hende muhe tuma e paso aki, sigur no ta facil, mirando cu e ta trece cu ne hopi sacrificio, reto, chercha y burla. Pa e motibo aki, hopi ta scoge pa privacidad, pa carera, y pa famia, cual tambe ta hopi importante, pero si tur dicidi pa esaki, nunca e necesidadnan di e ser femenino lo wordo scucha. P'esey ta importante pa tur hende muhe traha hunto y sostene otro, pasobra hende muhenan ta conoci pa ta fuerte, y por logra tur loke nan propone.

Durante e pandemia, por a mira cu e hende muhe a wordo mas afecta cu hende homber, ya cu nan mester a keda cas ora muchanan no por a bay scol, sacrificando asina nan carera como profesional. Tambe, hende muhe a wordo afecta mas cu hende homber pa cambianan climatico. P'esey, apesar di hopi avanse, nos tin un riesgo cu si nos no tuma accionnan determina y coordina, nos lo perde e avansenan, perdiendo asina tur loke nos mama, abuelanan, y nan generacionnan a lucha p'e.

Finalmente, Prome Minister a expresa; "Nos cada un a yega un caminda den nos bida, nos a logra cosnan grandi, pero tin di nos aki den cu tin hopi mas pa logra. Ban awe compromete nos mes, di prepara otro mucha muhenan y hende muhenan, pa ora nos baha cu pensioen, of laga nos puesto, ora nos subi e lift pa baha bek, tin un rij di hende muhe y mucha muhe para cla pa subi e lift pa asumi nos posicionnan. Ban duna tur loke nos tin, pa asina hunto cu hende hombernan por percura pa un bon balans", Prome Minister a expresa.

Prome Minister a gradici tur presente na e Celebracion di Hende Muhe y a invita nan for di awo pa otro aña, dia 8 di maart pa e siguiente celebracion riba Dia Internacional di Hende Muhe.





# Himno y Bandera

Aruba, Orguyo di nos tur

## Competencia Escolar

### Competencia di fotografia

- Saca un potret di loke ta laga bo sinti orguyoso di Aruba hunto cu e potret un texto cortico dicon e potret ta laga bo sinti orguyoso.
- Potret mester wordo saca "Horizontal".
- Tur mucha por saca potret y na final cada klas lo scoge e miho pa manda Comision Celebracion Dianan Nacional via e-mail [ccdn@cultura.aw](mailto:ccdn@cultura.aw)
- Tur scol preparatorio y basico por participa. Lo anuncia un ganado pa scol preparatorio y basico.
- Ultimo dia pa entrega potret ta 14 di maart 2024 pa 12'or di merdia.
- Potret por wordo saca cu celular of camara.

PREMIO

**AWG. 350.00**

na "giftbon" na un lugá di preferencia pa e klas Ganado.



Fotografia: Edrick Krozendijk

### Competencia di baile

- Tur klas di scol basico por manda nan video di baile creativo uzando e audio di e jingle "Aruba, orguyo di nos tur".
- E video mester wordo graba "Horizontal".
- Categoria Klas 1 te cu 3 y Klas 4 te cu 6: lo anuncia un ganado pa cada categoria.
- Video mester wordo manda via e-mail [ccdn@cultura.aw](mailto:ccdn@cultura.aw)
- Ultimo dia pa entrega e video di baile ta 14 di maart 2024.

PREMIO

**AWG. 750.00**

na "giftbon" na un lugá di preferencia pa e klas Ganado.

Jingle: Aruba, Orguyo di nos tur



Pa informacion di Aruba su Himno y Bandera bishita

[www.coleccion.aw](http://www.coleccion.aw)



Minister di Finansa y Cultura



Comision Celebracion Dianan Nacional



UNOCA



DCA  
Departamento di Cultura Aruba



SETAR ELMAR



WEB  
WATER- EN  
ENERGIEBEDRIJF  
ARUBA N.V.



Aruba Tourism  
Authority



UTILITIES ARUBA



ARUBA AIRPORT AUTHORITY





MINISTER

*Ursell Arends*

## SABA Y GOBIERNO DI ARUBA TA CUMINSA UN ERA NOBO DI RELACIONNAN Y DESAROYO POSITIVO



Diahuebs atardi Minister di Asuntonan di Adulto Mayor a reuni cu Jacques van der Scheer, presidente di Consejo di Supervision di SABA pa nabega un curso nobo pa e futuro di SABA. Un encuentro sumamente fructifero cu ta habri caminda pa establece un relacion renoba cu SABA, reflehando un compromiso comparti pa progreso y bienestar di nos adultonan mayor. Di e forma aki ta cera un capitulo di añanan largo di conflicto y disputa entre SABA y Gobierno di Aruba.

Un di e enfoke primario di e reunion tabata e solucion di e asunto pendiente di derechonan laboral (rechtstrekking) cu ta data desde 2008, afectando numeroso empleadonan cu ta den espera di nan compensacion debido. Gerencia di SABA ta den proceso pa ehecuta e pagonan.

E anuncio di un directora nobo ta marca un era nobo den e trayecto di SABA su maneho y eficiencia operacional. E nombramento recién a ser acepta cu elogio for di Ministerio, mirando esaki como un momento pivotal pa fomenta un relacion mas saludabel entre Gobierno y SABA.

Combersacionnan ta andando pa loke ta trata e subsidio pa 2024, y asina finalmente concretisa acuerdonan mediante e Landsbesluit. E paso aki ta subraya un dedicacion mutuo pa

asegura estabilidad financiero y desaroyo sostenibel pa e cuidu brinda door di SABA.

Minister Arends ta sumamente satisfecho cu e hecho cu SABA ta duna su maximo esfuerso pa atende cu e amplacion di cantidad di cama. Esaki ta duna espacio pa aloca mas adulto mayor cu tin e necesidad di cuidu 24/7. E ampliacion ta aporta na e meta di Gobierno pa alivia e lista di espera pa luganan den cas di cuidu y alabes ta significa e resolucion di SABA pa mehora infraestructura di cuidu pa adultonan mayor.

Tambe a elabora ariba e infraestructura cu mester di atencion urgente pa asina por cumpli cu condicionnan vigente pa casnan di cuidu. Sigur un punto hopi importante pa crea un infraestructura adecuado y facilidadnan accesibel pa garantiza e cuidu di nos Adulto Mayor den un forma responsabel.

Gobierno di Aruba ta redifini e relacion cu SABA unda ambos partido ta expresando optimismo pa e futuro. Door di atende cu asuntonan riba areana critico di desaroyo, SABA ta prepara pa un futuro marca pa progreso y cuidu mehora pa adultonan mayor cu sosten y den cuadro di maneho di Ministerio di Asuntonan di Adulto Mayor.





## FELIZ DIA DI HENDE MUHE

Ariba un dia tan special manera awe, Minister Dangui Oduber ta tuma e oportunidad pa extende su aprecio di curason na tur e hende muhenan di Aruba. E dia aki ta sirbi como un recuerdo di tur e contribucion valioso cu hende muhenan ta haci pa nos sociedad sea aki na Aruba of den tur parti di mundo.

Minister Dangui Oduber ta termina deseando tur hende muhenan na Aruba un Feliz Dia Internacional di Hende Muhe! Cu tur muhenan logronan sigui inspira otro y nan esfuersonan mutuo prepara e caminda pa un futuro mas briyante y mas husto pa un y tur.

Ariba nos pais bunita, nos ta reconoce y celebra e logronan, resistencia y e forsa di nos hende muhenan. Nos ta reconoce

*Laga nos para uni den alegria ariba e dia tan special aki.*

cu nan ta hunga un papel vital den forma nos cultura, crea unidad y pusha pa e progreso den diferente tereno na Aruba. Ta crucial cu nos sigui lucha pa segura cu cada hende muhe tin e oportunidad pa persigui su soñonan, ambicionnan y aspiracionan. Hunto Aruba mester crea un sociedad unda tur individuo, no importa di ki genero, por prospera y aporta nan talento unico y nan contribucion pa nos pais.

Pa tur e hende muhenan di Aruba, Minister Dangui Oduber a expresa e siguiente frase: “Bo forsa, sabiduria, y compasion ta e pilar riba cual nos sociedad ta para ariba dje. Awe nos ta celebra boso y como Minister di Turismo y Salud Publico, mi ta compromete pa sigui traha riba un futuro unda cada hende muhe ta empodera, respeta y ta berdaderamente igual.”

**FELIZ DIA INTERNACIONAL  
DI HENDE MUHE**  
8 MARCH 2024

CU BOSO LOGRONAN SIGUI INSPIRA OTRO  
Y CU BOSO ESFUERSONAN MUTUO POR PREPARA E  
CAMINDA PA UN FUTURO  
MAS BRIYANTE Y MAS HUSTO PA UN Y TUR

**MINISTER DI TURISMO & SALUD PUBLICO**  
SR. DANGUI ODUBER





## PROME PASO PA FINANCIAMENTO PA INDUSTRIA AGRICOLA (AGRIFUND) A SER COMPLETA



Minister Geoffrey Wever, a firma dilanti waarnemend notaris mr. Caterina Hernandez Escobar, representando notaris mr. Chamila Tromp, un akte notarial a base di cual e statutan di Banco Arubano di Desaroyo N.V. a ser modernisa y converti den Aruba Agri Development Corporation N.V.

Pa por logra incorpora e asina yama AGRIFUND a identifica Banco Arubano di Desaroyo N.V., un empresa bieu di cual Gobierno di Aruba ta unico accionista y pa años tabata inactivo y tabata tin derecho riba un suma di mas o menos Afl. 1.200.000,00, como e vehiculo pa yega na e AGRIFUND.

A tuma 2 aña por medio di un proceso legal y despues cu a logra obtene un veredicto di hues den favor di Gobierno di Aruba, a haya acceso bek na e suma di mas o menos Afl. 1.200.000,00. Ayera, e prome paso a ser tuma convirtiendo Banco Arubano di Desaroyo N.V. den un empresa cu su meta pa stimula agricultura comercial y asina forma e fundeshi di

un pilar economico nobo pa Aruba, contribuyendo asina na diversificacion di Aruba su economia.

Minister Wever, encarga cu economia, y Minister Arends encarga cu sector primario, tin hunto como maneho pa stimula agricultura comercial como pilar economico nobo y pa e motibo aki pronto lo ta incorporando hunto cu Qredits Aruba un AGRIFUND, esta un fondo pa financia empresarionan agricola na interes abou y na un forma cu ta apropra pa e sector aki. Presente na e momento importante aki tabata Minister Ursell Arends y Sra. Nathaly Harms, representante di Qredits Aruba.

Cu e pasonan aki Aruba ta poniendo e fundeshi pa un futuro agricola comercial mas innovativo y sostenibel. “Nos a priminti cu nos lo bin cu un AGRIFUND, y awe despues di dos aña di trabou, e prome paso concreto pa logra e AGRIFUND a keda completa y dentro algun dia nos lo tin mas noticia importante riba e topico aki”, segun Minister Wever y Minister Arends.





## MINISTER ENDY CROES A INTERCAMBIA IDEA CON PA FORTIFICA E LASO DI HERMANDAD ENTRE ARUBA Y BONEIRO



Recientemente, Minister Endy Croes hunto cu Ministerio di Deporte a reuni cu Sr. Terrence de Jongh, kende ta director di Indebon na Boneiro. Indebon ta e organisacion cu ta atende cu tur deporte, facilidad y mantencion di e facilidadnan deportivo na Boneiro. Sr. de Jongh tabata na Aruba, en conexion cu Weganan Interinsular 2024.

Durante e encuentro, a intercambia idea pa por sigui crece e lasonan di hermandad entre Boneiro y Aruba mediante deporte y cultura. Weganan Interinsular ta desea di agrega cultura riba e agenda pa aña 2025. Tambe, a comparti contacto di e companianan cu Aruba y Boneiro ta traha cu nan pa, entre otro, cancha di futbol, cancha di baseball y luz pa veld. Fuera di esaki, a toca e tema di Koninkrijksspelen. Pa conclui, Minister Endy Croes a expresa cu e tabata un bon reunion, unda cu diferente idea nobo a bin padilanti. ■■■

# SINTONISA

## CONFERENCIA DI PRENSA DI GOBIERNO DI ARUBA

Gabinete Wever-Croes

**DIALUNA Y DIAHUEBS | 10:00 AM**





# DAO TA CONMEMORA 'DIA INTERNACIONAL DI HENDE MUHER' CU UN BISTA HISTORICO Y CONTEMPORANEO RIBA E PARTICIPACION DI HENDE MUHER RIBA E MERCADO LABORAL ARUBANO

Dia Internacional di Hende Muher, ta e fecha riba cual mundialmente ta celebra y ta conmemora e avancenan logra pa e ser femenino. Den cuadro di Directie Arbeid en Onderzoek (DAO) su 20 aña di aniversario, ta celebra e dia di awe compartiendo algun datos interesante riba e participacion di 100 aña pasa di e hende muher riba e mercado laboral. Ademá di e bista historico aki di aña 1924, ta presenta tambe datos di e situacion contemporaneo. Aruba tin un compromiso haci cu e accion nan necesario pa logra e Sustainable Development Goals (SDG's) di cual un di e metanan ta igualdad pa e ser femenino. SDG's ta consisti di 17 meta en total cu e proposito pa trece desaroyo balansá. Particularmente riba Dia Internacional di Hende Muher, DAO kier ilustra e importancia di Goal #5 (Gender Equality) y Goal #8 (Decent Work and Economic Growth).

## INTERNATIONAL LABOR ORGANIZATION

E aña aki 'International Labor Organization' (ILO) y 'United Nations' (UN) nan tema pa e Dia Internacional di Hende Muher ta 'Invest in women: Accelerate progress'. E tema general aki ta toca area cu ta rekeri atencion y accion pa asina garantisá cu hende muher no ta cay atras.

E tema general aki ta cubri 5 area clave rekeriendo atencion y accion pa asina garantisá cu hende muher no ta cay atras. Esakinan ta: 1.'inverti den hende muher: un cuestion di derecho humano', 2.'poniendo un fin na pobresa', 3.'implementando financiamiento cu un perspectiva riba genero', 4.'un cambio pa un economia berde y un sociedad di cuidu', y 5.'apoyando feministanan 2 treciendo cambio'. E recomendacionan haci ta pa contribui na un desaroyo positivo pa mucha muher y tambe e muher adulto.

E enfasis aki ta pa asina percura cu progreso economico, social y ambiental por wordo comparti na un forma cu tur persona y futuro generacionan por beneficia di dje. Estudionan a demostra cu inversion haci riba e progreso di hende muher ta wordo inverti y comparti bek den e comunidad cercano. E esfuersonan cu e hende muher ta haci ta hopi vez no solamente pa su mesun bienestar, pero tambe pa su famia. E lasonan fuerte aki ta permiti pa recursonan (p.e. financiero o di conocimiento) wordo comparti.

## 1924, ARUBA

For di un bista historico e cuestion di e participacion di hende muher riba e tereno laboral di Aruba ta uno cu ta consisti di e hende muher trahador. Na aña 1924 for di e total poblacion di esnan emplea, 59% tawata consisti di hende muher y 41% tawata consisti di hende homber. Mester nota cu comienso di e siglo 20 tawata uno economicamente dificil. Desempleo y tambe e impacto di segura a resulta na diferente periodo unda cu pa gran parti hende homber (esnan casa y esnan

soltero) a bay busca trabou den exterior (p.e. Venezuela, Colombia, Cuba, Curaçao y Surinam).

E fenomeno aki no a resulta den e inactividad di e muher o dependencia di placa for di exterior.

E placa cu por a wordo manda bek pa Aruba tawata tarda, y tambe diferente factor por a impacta homber nan habilidad pa provee pa nan famia. Pues e gastonan di hogar y e cantidad halto di yuinan pa alimenta a keda un factor motivando hende muher pa traha.

Na aña 1924 e profesionan mas practica na Aruba tawata: trahador di sombre (39%) y agricultor (22%). Aunke cu ambos sexo a practica e ofishinan aki, agricultura tawata mastanto domina pa hende homber y trahador di sombre tawata un ofishi cu mastanto hende muher a practica. Como cu e produccion di sombre tawata tuma lugar den e hogar. Esaki a duna e espacio

pa hende muher por ordena nan dia pa combina e trabou y e cuidu di yuinan.

E siguiente tabel ta duna un bista di e trabou/ofishi cu hende muher a practica na aña 1924:

Fuente: Kelly, Lucia (1999). Participacion di muhenan Arubano na e proceso laboral den e periodo 1900 – 192. Publicacion di Archivo Historico Nacional.

E datos presenta ta contradeci e imagen di e hende muher di antes como solamente un 'ama de casa'. E realidad ta indica cu apesar di prejuicio combina cu e carga familiar di cuidu di yuinan, e hende muher a haci un gran contribucionan laboral.

Top 3. ofishi practica pa hende muher Aña 1924

Trahador di Sombre 67%

Cosedo 16%

Sirviente di Cas 6%

## 2024, ARUBA

E contexto contemporaneo ta uno cu ta refleha en general e desaroyonan positivo den cuadro di igualdad di genero. E siguiente lista ta brinda un bista di e posicion di hende muher riba e tereno laboral.

1. Di tur contracto laboral pa temporada indefini riba e mercado laboral, e trahador femenino ta representa 53% di e grupo akinan, hende homber 47%

2. Di tur esnan riba e mercado laboral cu un educacionan na nivel superior (HBO+), e trahador femenino ta representa 58% di e grupo aki, hende homber 42%

3. Di tur e ocupacion di un nivel halto di habilidad (higher skill level), e trahador femenino ta representa 56% di tipo di ocupacionan aki. Departamento di Labor y Investigacion ta felicita tur hende muher riba e dia aki pa nan logronan extraordinario y nan contribucion pa cu e economia di Aruba.



# Women in the Workforce

International Women's Day Aruba 2024

## Characteristics

- Average age of women in the labor force: **44 years old**
- Average female worker has **more than 10 years** of service with the same employer
- Of all the permanent (for an indefinite period) employment contracts, women hold **53%** of these types of contracts
- Of the working population with a tertiary education (HBO+), **58%** are women

## Occupation\*

- Higher skill level occupations are dominated by women. Women represent **56%** of these occupations (managerial, and professional occupations)
- The top 3 occupations held by all women in the workforce shows the following: Service and Sales Workers (**24%**), Elementary Occupations (**17%**), and Clerical Support Workers (**14%**)

## Sector

*The top 3 sectors women in the labor market participate in are:*

- Accommodation and food service activities: **32%**
- Wholesale and retail trade; repair of motor vehicles and motorcycles: **19%**
- Administrative and support service activities: **10%**

## Labor Indicators


- Participation Rate: **57.3%**
- Employment Rate: **54.3%**
- Unemployment Rate: **5.3%**

Source

Labor Force Survey (LFS) 2021, 2022. Centraal Bureau voor de Statistiek (CBS), Centrale Bank van Aruba (CBA), Directie Arbeid & Onderzoek (DAO); Sociale Verzekeringsbank (SVb), 2022

Note

Occupations based on 'The International Standard Classification of Occupations'







## Gabinete Wever-Croes

Pa cada ciudadano di nos pais, Arte di Muraya na San Nicolas ta un recordatorio, cu hunto nos por cambia e ordinario den algo extraordinario. Laga nos admira e artenan aki cu curasonnan habri, permitiendo e beyesa di e murayanan activa nos imaginacion y inspira nos pa crea un pais mas colorido, bunita y conecta.

# 2024

AÑA DI STABILIDAD Y PROSPERIDAD